

TNC 303 ~~8.7~~ ^{5.31} / 145 / 75

4

18612



38618



寓賢圖釋序

古人藏修必於名區勝地者蓋藉其靈秀

識見鬯其胸臆俾業可成而德可就其名山又必

得賢人君子寓遊其間然後其名亦可托之不朽

古稱地因人重人從地顯者豈虛語哉武夷自我

朱夫子卜精舍於隱屏之下借胡劉游蔡諸賢哲


講學其中使周孔之道煥然聞海而世之縉紳先

輩莫不眎夷山曲水爲洙泗爲濂洛者皆諸先生

之力也故圖而肖之少寄夫泰山喬嶽之景仰云

徐表然





劉夔字道元本邑之永漿里人第進士權侍御史進
給事中樞密直學士知鄆州兼京東安撫使尋遷
工部侍郎知福州移建州以戶部侍郎致仕築室
武夷號山北居士謝絕塵世究心理學時以吟咏
自娛所著有文選筆粹晉書指掌春秋褒貶諸書
及本山志

張嶠字景山本邑人太傅靄之子也隱居武夷山陽
雖以漁釣自適然而道德外著太平興國間召入
朝授右贊善大夫遷御史中丞贈工部尚書





詹先野字景舒本邑人博通經史以忠信篤敬自持
天聖四年應賢良薦後竟不仕隱居武夷廩江之
濱每嘯咏山水間終日忘倦



楊時字中立南劍將樂人同游酢受業於河南二程
先生得孟子不傳之學於遺經常過武夷每館懋
於諸賢者之寓惓惓山水篇什盈篋熙寧中登進
士累官至工部侍郎直學士世號龜山先生謚文
肅

游酢字定夫本邑人與兄醇少以文行知名吐遊京
師受業於河南程明道伊川先生之門第進士調
肅山尉近臣薦其賢召爲太學錄選博士復同楊
時立雪程門載道而南築水雲寮於武夷五曲爲
講論之所晚擢監察御史知漢陽軍及和舒濠三
州卒謚文肅



胡安國字康侯本邑人登紹興進士第三嘗入太學
師程頤之友朱長文及靳裁之與楊時游醉謝良
佐諸賢遊良佐稱其如大冬松柏挺然獨秀者也
自王安石廢春秋不列學官公獨潛心二十餘年
撰傳以進高宗深加褒納進寶文閣直學士與時
相不合退居武夷山中自號武夷翁學者稱爲武
夷胡先生卒謚文定胡憲胡寅胡宏胡寧皆其子
也世稱爲胡氏五賢今縣有五賢祠






劉子暈字彥冲邑人以父韜蔭補承務郎通判興化
軍尋以宿疾辭歸主管武夷冲佑觀有聞命詩云
幾年歸夢水雲間猿鶴重尋已厚顏慚愧君恩猶
竊祿官衙新帶武夷山山居不出者十七年與胡
憲劉勉之交每見講學外無雜言從游者皆當時
名士如朱元晦其一也學者稱屏山先生有文集
二十卷行世追封齊國公謚文靖

胡憲字原仲文定公之徙子也得文定學獲聞伊洛
之說以鄉貢入太學會洛學有禁乃陰與劉致中

殫精研誦復問易於涪陵譙天授久始有得兩膺
詔召俱以母老辭時秦檜用事先生隱處無復當
世念檜死始應召爲秘書省正字抗言虜情請急
用張浚劉錡爲虜備疏入即求去改秩奉祠時與
劉彥冲劉致中更相討論于武夷山中學者翕然
尊之稱曰籍溪先生朱元晦呂東萊從學最久有
論語義兩漢正辨南華真經解行世卒謚靖肅

劉勉之字致中邑人踰冠以鄉舉入太學時禁挾元
祐書獨與胡原仲陰購程氏遺文旦夕講誦又從

譙天授遊蕪濠易學紹興間以呂本中疏薦召詣
闕秦檜慮其持正撓阻和議乃不引見但令策試
後省給筆札而已因謝病歸日與胡原仲劉彥冲
夷猶於九曲山水間杜門掃軌一以講學爲事朱
喬年知其學有淵源疾革遣其子熹往師之遂妻
以女撫教如子姪學者稱白水先生有集二十餘
卷行於世



胡寅字明仲本文定公縱子文定取而子之蚤歲聞

道於家庭後擢宣和進士甲科又歷中外後改秘

校時楊中立為國子司成遂執經請業卒紹伊洛

之傳立朝屢陳復讐大義為當國者所嫉力求外

補除禮部侍郎兼直學士趙鼎薦可大用會丁外

艱服闋除知永州以疾請祠隱居武夷嘗與劉衡

建奉秀亭於羅漢岩上以為講學之所扁其居曰

致堂學者稱致堂先生卒謚文忠有遺藁三十卷

又有讀書管見論語詳說崇正辨行於世

劉衡字兼道邑人建炎初以勤王補官從韓世忠敗

金人於濠累功遷秩晚年棄官抱道武夷築小隱

堂與胡明仲講學討論時以詩酒自娛風晨

月夕常吹鉄笛或慷慨舞劍意氣浩如也

胡宏字仲文定公之季子幼事楊時侯仲良而卒
傳其父之學與其弟寧優游於武夷山中二十餘
年玩心神明不啻晝夜紹興中上書數千言物以
蔭補承務郎不調秦檜死宏被召以疾辭所著有
知言并皇王大紀八十卷學者稱爲五峯先生





朱熹字元晦又仲晦號晦庵學者稱為晦庵先生其

先徽之婺源人年十四以父命遷崇安依劉致中

從學而居之焉扁其所曰紫陽書堂志不忘鄉閭

也紹興間第進士累官至徽猷閣待制因阻和議

遂以閣撰奉祠築精舍于武夷五曲大隱屏之下

與諸門人及壻黃幹講讀其中註釋六經繼往開

來為萬世道統計續有召命堅辭不赴偽學禁興

滄洲病叟又號遜翁優游嘯咏于武夷山水間者

四十餘年仕於外者僅九考立於朝者不滿五十

日山林之日長講學之功深也年七十一



蔡元定字季通邑人號西山幼穎悟異常及長學益
 精粹天文地理禮樂兵制度數皆正其流而會於
 一寓居武夷清苦自勵有詩云數間茅屋環流水
 布被藜羹飽煖餘不向利中生計較肯於名上着
 工夫窓前野馬閑來徃天際浮雲自卷舒窮達始
 知皆有命不妨隨分老樵漁從朱文公遊九年

四十年

在弟子列文公以老友稱之慶元間權臣排壻正
 學文公首黜先生以布衣謫道州文公餞諸靖安
 寺携其子沉懷慨就道獨無幾微見於顏面見者
 莫不偉之所著有太衍詳說律呂新書燕樂言辨
 皇極經世太玄潛虛旨要洪範解八陣圖說陰符
 經解運氣節畧脉書總若干卷淳祐間追謚文節



黃德秀字景元浦城人四歲受書過日成誦慶元中
 第進士累官至叅知政事世稱西山先生卒謚文
 忠西山之學嘗築室武夷以朱文公為宗慨然以
 斯文自任黨禁既開而正學遂明於天下後世所
 著有大學衍義讀書記文章正宗



祝穆字和甫其先歛人魯祖確於朱文公爲外祖父
康國始卜居崇安穆與弟癸同事文公於五曲精
舍得其微言緒論嘗著事文類聚二百餘卷方輿
勝覽七十卷行於世

方士繇字伯謨其先莆田人移居崇安嘗依劉子羽
創屋居之年三十不踐場屋每從朱文公於武夷
棲止仁智堂中追隨講授退惟靜處一室緇閱千
古肆力於道德性命而統會其旨會偽學禁興人
無間言所著有遠菴集





劉煥字晦伯建陽人與弟炳同學於朱文公第進士
 調山陰簿慶元中偽學禁興遂結雲莊山房於武
 夷為淑身計嘉定初召赴行在累官工部尚書年
 七十丐閒章凡二十卒贈金紫光祿大夫少師謚
 文簡配享文公祠

游九言字成之初名九思文肅公三世孫也嘗於武
夷重構水雲寮爲繼志讀書之所以蔭舉江西清
司進士第一授古田尉江州錄事知光化軍辟荆
鄂叅謀官卒端平初贈直龍圖閣謚文靖





蔡沉字仲默元定之子自號九峯嘗偕昆弟蔡淵蔡
 沈於武夷虎嘯峰下構屋爲讀書所扁曰南山草
 堂屏去舉子業一以聖賢爲師每從事於朱文公
 之門而文公器之故晚年以訓釋諸經畧備獨書
 未及爲遂以屬之又元定亦嘗慨洪範之數失傳
 心雖獨悟未遑論著曰成吾志者沉也沉受父師
 之託潛心紬繹者數十年然後成書徃徃發明先
 儒之所未發當時諸公交薦沉不屑就卒謚文正
追封崇安伯
 蔡淵字伯靜號節齋寓武夷所著有周易訓解於世



雨字嶽卿衡之子也事親以孝聞嘗隱於武夷山
 北水簾洞朱文公與蔡西山諸賢頻詣其廬講明
 義理嘗約文公結廬於五曲未幾卒文公以詩哭
 之曰魯說幽棲地與君共接連欲携邀月酒同棹
 釣魚船遽爾悲聞笛直成嘆絕絃林猿催老淚爲
 子一潸然




劉清夫字靜甫建陽人世居麻沙與武夷僅隔二舍
許常寓遊武夷山中泛舟携酒吟咏殆遍有梅花
詞一闕云亂山深處見寒梅一朵皎然如雪的皚
妍姿羞半吐斜映小窓幽絕玉染香腮酥凝冷艷
容態天然別故人雖遠對花誰肯輕折疑是姑射
神仙幔亭宴罷迤邐停瑤節愛此溪山供秀潤飽
玩洞天風月萬古叢中百花頭上誰與爭高潔粗
蠢俗李不須連夜催發人多傳誦惜不見其全集




蔡杭字仲節號久軒沉之子也於武夷一曲構味歸
 堂以爲藏修之所後登紹定進士累官吏部尚書
 端明殿學士同知樞密院事拜叅知政事落職奉
 祠卒謚文簡改文肅

趙抃字閱道衢州人康定間爲崇安令政尚寬簡本
于孝弟邑舊多水趙作石隄障之又于城中穿爲
溝渠民賴其利公餘嘗嘯咏武夷山中結吏隱亭
于金鷄洞下沿溪種梅甚復種梅于縣堂之後後
人思之稱其梅爲清獻梅銘曰召有栢菜有松清
獻之梅碑以石祀于名宦所著有武夷長篇



詹師文字叔簡邑人登慶元丙戌進士調婺源簿遷
江西憲司檢法秩滿授西外宗教歸築室武夷幔
亭峯下杜門著書無復仕進號幔亭老人有幔亭
藁數卷






范師孔字學可邑人咸淳中預薦肄業武夷書院三
司辟充講書橫經拆理究極精微後學多賴之尤
工於詩所著有畫餅編行於世

趙若櫬字子木號霽山邑人登宋甲科不仕性惆儻
喜吟咏嘗徜徉於武夷山水間有會心處輒居數
日不治生產有即事詩云雲散青山出人閒白晝
長禽聲答空谷木影盡斜陽種菓期秋實澆花稱
晚涼行藏天已定隨分且徜徉又云可意黃鸝喚
得醒日移山影正當庭飛花忽起東風過點破苔
痕一片青人稱其逼真盛唐

鄭德普字子仁號景厓邑人幼聰敏博記刻意于詩
與范師孔趙若櫬諸人日相酬唱於武夷九曲之
間如題靈岩云山蒸雲氣晴能雨泉挾風聲夏亦
寒題齊雲峯云石潤黏蒼蘚澗高流白雲皆佳句



熊禾字去非號退齋又號勿軒邑人登咸淳甲戌進
 士任汀州司戶入元不仕少慕朱文公之學常往
 來武夷精舍疏修葺之及棄官歸武夷築書堂與
 生徒旦夕講論其間每朔望必詣精舍展謁遠近
 翕然宗之嘗自賦詩云當年衛道大賢功人士今
 知有學宮自嘆升堂慚董子豈無笑列議韓公儒
 風濟濟衣冠舊世事茫茫塵網中我已結茅溪九
 曲飛鳴尚許遡天風所著有易詩春秋集疏四書
 小學集疏大學廣義標題四書易經講義行世



江贊字叔圭邑人宋政和間太史奏少微星見詔徵
 遺逸凡三聘不起乃賜號少微先生居武夷著書
 立言有通鑑詳節行於世



徐幾字子與號進齋邑人嘗與詹琦築靜可書堂於
武夷博通諸經尤精於易自朱真後理學之傳獨
臻其粵景定間臣僚交薦以布衣登殿授崇政說
書上甚器重詔補迪功郎添差建寧府教授兼建
安書院山長撰經義以訓多士宇內尊之稱曰進
齋先生

游應祥字子善邑人文肅公七世孫天資淳厚博通
經史元初任武夷直學寓山中著述甚富後陞學
正而卒



詹景仁字天麟邑人以文學辟爲三公掾延佑中出
貳浙東憲幕遷江西撫州總管與清江杜本友善
初本偕范梈同寓景仁館談及先世知其藏書甚
富後本忤時相不用景仁携歸武夷築萬卷樓於
平川上居之以資叅討暇則與本泛舟九曲散步
諸峰賡唱迭和晏如也



杜本字伯原號清碧清江人通諸經尤精皇極之旨
與虞集范梈友善吳澄劉會孟見而器之江浙使
相忽刺木薦其才於武宗召入不果用詹景仁延
歸武夷築室於平川上居之遂結思學齋懷友軒
爲終隱計文宗即位詔起之山中不赴釋書無逸
篇附進文宗納焉至正三年丞相脫脫奏授翰林
待制兼國史編修官強應命次武林驛仍以疾辭
復歸武夷平川優游數年而後卒有清江碧嶂集
行世

杜圻字德基本之孫仍居武夷幼有大志苦學砥行
思紹述其祖業因名歲修之所曰思紹堂仰思俯
讀一以先哲爲師落筆動契成論士大夫遠器期
之後以薦舉授甌寧訓轉温州府教授卒




蔣易字師文建陽人聰敏博洽善屬文從事柱本於
武夷者數年吟咏尤工聲華籍甚爲本序清江碧
嶂集所著有鶴田稿及元朝風雅十餘卷行世

藍山字靜之世居武夷山南博學能文爲武夷書院
山長蚤歲與弟智同學於柱本遂以詩鳴洪武中
智舉明經擢西粵憲僉以清介著自號藍澗生平
靜修武夷山中所著有山澗詩集行於世



丘錫字永錫邑人領洪武己卯鄉薦歷事工科自陳
願學職除衡州教授永樂四年預修大典改衡州
教授宣德七年復預修

太宗皇帝實錄書成仍乞教職改建昌教授自筮仕
凡典文衡者五人服其公性嗜學垂老偕其友徐
仲禮優游於武夷山中終日手不釋卷卒年八十
有文集若干卷



鄉守益號東廓嘉靖末南遊武夷以良知學啓迪諸
生後公胤子善總憲八閩弭節山中仍與諸生論
學聞者興起遂建祠以示儀刑

羅洪先號念庵嘉靖中公辭承明臥石蓮洞毅然倡
明心學寓武夷者踰季公清標卓行爲一時山斗
因樹其祠以範後學

王守仁字伯安浙江餘姚人登進士授兵部主事以
論逆瑾謫貴州龍場驛丞由間道入武夷游覽數
旬而去瑾誅復起累遷至副都御史提督南贛等

軍務屢平寇盜以倡義討盜藩卒贈新建伯嘉靖
 間郡守劉公佃以良知之學倡自公始飛鳥所憇
 教範攸寓因檄縣祠公于武夷給田五十餘石用
 修祀事續以甘泉湛公若水東廓鄒公守益荆川
 唐公順之配扁曰國朝理學四先生祠

宗臣字子相南直廣陵人由進士授考功郎中陞編
 建提學副使以身範士八閩文體為之一變嘗與
 諸生輩講學山中郡檄祠祀

傅汝舟字木虛侯官人負雋才善草書工於諸嘗寓

止止庵與江山人一源結為煙霞交貽江詩曰安
 得草堂移傍汝溪光清映日綸巾而江山人亦有
 相逢却是秦人谷攜手虹橋看日斜之咏夷猶賡
 唱相結甚謹有詩集行世

仙真圖釋序

徐表然

語云山不在高有仙則名矧武夷甲秀于天下而
與五嶽抗衡者哉則其產異人而證仙真又何疑
焉迄今虹橋架閣瓊崖遺蛻尚留丹壑至于亢旱
鄉之人迎而禱之甘澍旋注所以造福于我民者
又如彼其膺金籠玉簡之寵而報祀于無窮者職
以是哉垂之遊者或夙締仙緣時有奇觀孰謂壺
天內不別有一乾坤耶山之僊真羽流姑自世所
傳播及舊志所紀載者亦圖釋之以記其盛

婁師鍾晉時人修煉武夷山中茹芝朮勤吐納吸日月精光後冲舉仙去

薛邴唐時人修煉山中仙太事實失傳

李鉄笛洛陽人名字年代莫考在止止庵修煉仙去

李磨鏡燕山人名字年代莫考在止止庵修煉仙去

俱見白玉蟾止止庵記中





李陶真宋熙豐間至武夷居止止庵出祠牒乃唐開
元時所給者衆俱笑之而莫悟真人好吹鉄笛有
穿雲裂石之音遇節臘諸道士皆招飲於雲房陶
各赴之諸房笛韻同時並作衆俱駭愕嘗與衆游
九曲溪忽自投於深潭衆驚懼急回陶真已鼾睡
榻上矣後煉丹於通仙岩一日齋沐別衆留詩云
毛竹森森自剪裁試吹一曲下瑤臺當途不遇知
音聽拂袖白雲歸去來遂吹笛隱隱乘雲而去



張艸衣名代莫考得道鼓子峯下白玉蟾想慕清標
爲記其事



其人名字年代莫考嘗驅雲岩巨蟒翔其庵以居
之後得道於鼓樓岩下 見白玉蟾雲窩記中

孔氏莊氏葉氏三女仙俱會稽上虞人唐天寶間學
道棲天柱峯下一日遇元君授以丹訣指其徃東
南尋雲虛洞脩煉果得均峯仙洞幽深道成乃投
身於換骨岩遂飛仙去治平間歲大旱里中有江
公小三者苦其田於均峯下遇三女惠以小胡蘆
水令酒旱田是夕大雨霑足秋大稔江公徃謝緣
山小徑深入忽有洞府扁曰雲虛之洞仙童引見
三仙飯以胡麻既辭歸行數里桃花夾徑渡一小
澗出三姑石下至家三載矣





道人失其名清獻趙公宰邑時鄒以產戶應衙役
爲錄事奉公甚恭一介不妄取公秩滿貧不能歸
鄒鬻棊得錢百緡以助其行公不受既而詢問果
鬻棊錢始受之鄒自是棄妻子學道武夷山中過
昇真洞遇張真君授以九轉丹訣得道尸解於幔
亭峰



吳懷玉邑之新豐鄉人生平曠達習靜武夷山中行
 坐常閉目人問之故不答因稱為眇翁年九十六
 而化初真人之未解也每醉輒狎狂歌笑逢人即
 與指武夷君像曰歲在戊子降為人主指魏真君
 像曰三十有八載當撫平四海後果歷驗且真人
 遁化之明年太乙宮監齋獲遇真人於京城而言


武夷瑞壺之說尤詳故楊文公家集云真宗神宗
 哲宗皆自十三仙中來宋建守陳奩民過武夷詩
 曰昇真洞口接天門靈州州花日日春聽說列仙
 來瑞壺三朝德澤在斯民又王埜有歌云列仙高
 拱兮宅玄都三聖繼御兮恢炎圖措斯壺於平又
 應皇家兮瑶符見方輿勝覽及舊志



王通未平人宋元豐間學道武夷居毛竹洞深窈玄
旨能飛神御氣呼召雷雨治平三年五月念五日
辭衆往黃栢山會聖洞坐化詔封洞明普靜真人
仙斲尚存

徐熙春邵武人熙寧中學道武夷常夢一鉄冠道人
容貌雄偉相揖與語覺而異之詰朝城南果邂逅
一鉄冠士宛若夢中見者自云姓蔡邀真人飲臨
別約會昇真洞下至期果笑迎於九曲溪頭授以
丹訣後坐化昇真洞側崖穴中全畧猶存萬曆間
旱魃爲災邑侯迎其禱雨獲應遂建樓于會真廟
後以祀之





張垓後漢三山人又云名淡坐化松大王峰半壁石
室中相傳謂張仙將解時其母追至呼之其首轉
盼迄今千載遺醜回顧岩下視焉背上有白點如
錢者六七右手有一杰字旁有石方正云樵者見
石上有金蟬蜎仰顧因號為張金蟬萬曆間按院
楊諱四知見其裸裎無飾遂命工匠以土衣之併
以鉄為欄以護其躰尤所以全其形於萬世之後
也

徐項邑之黃連坑人嘗於三髻山遇二仙對奕方啖菓擲其餘於地目使食之歸即辟穀能知人意度內事所居常有雲氣行步如飛履崖壁若平地入水不溺乾道中歲旱邑侯諸葛庭瑞迎之祈禱真人登鍾樓望三髻山招呼之忽有朵雲西來項史雨下合境沾足尸解後鄉人感其應禱爲之立祠亦常有人於昇真洞見之



郭道人埋其名自稱卧雲子居武夷能預知人禍福
輒奇中紹興遇諸葛行正因言行正履歷事如目
親行正異之遂仰事焉同行市中遇軍職趙姓者
曰此人吾親見死松京師何以至此道人謂行正
曰人既識我難久處矣行正曰將焉往道人曰孤
雲野鶴隨其所之遂不辭而去後三年道人復至
武夷行正事之如初授以長生訣乾道壬辰八月
道人坐化昇真洞嵯石上行正亦坐化鉄板嶂頂





知微子樵陽人嘗採藥山中遂結茅于毛竹洞旁餌
松飲水得冲舉術有知微子一卷行於世眉山蘇
軾爲之叙

白玉蟾本姓葛名長庚號瓊瑤又號雲外子其大父
曰有興福州閩清縣人任瓊州教而生玉蟾時紹
興甲寅三月十五也祖父繼亡隨母適白氏因借
白姓天資敏慧丰神秀異經書一覽即了大義自
謂壺間有字之書無不經目文思汪洋洒落頃刻
數千言且書畫通神人亦共仰初真人之十歲也
應童子科主司命賦織機詩即應詠曰大地山河
作織機百花如錦柳如絲虛空白處做一匹日月
雙梭天外飛與主司意弗不第遂拂袖不復還鄉



遇泥丸真人陳翠虛携入羅浮未幾遣其遍遊名山乃於黎母山中遇神人授以洞玄雷法能呼召雷雨馘攝精魔以斯九靈飛步章奏及太上紫樞玉宸洞陽飛梵煉度之科五雷秘法親陳謝表至今萬年宮道士猶得其傳按白真人初到武夷時無有識者獨詹琰夫異之乃重建止止庵以居之焉自是真人致札回謝泥丸諸師爲主盟茲山計其詞曰這回歸去武夷山下第三峯住我舊時庵子碗水把柴升米活火煮教濃笑指歸時路弱水

海之東又嘗自讚曰千古鬚頭跣足一生服氣殮霞笑指武夷山下白雲深處吾家繼而道成之後變化莫測汎舟西湖水遁仙去人猶見於武夷山中嘉定末詔徵赴闕對御稱旨命館太乙宮一日不知所往詔封紫清明道真人有瓊瑄集行於世

陳冲素號虛白入武夷脩道遇異人授以丹法著規
中指南畫露内丹三要之旨丹成與一樵者飲忽
仆地夢入一洞府有物迸出曰青靈芝即採食之
自是飲水不復粒食年餘仙去





吳公名代失傳在鼓子峯右石室中修煉得道偶將
炭於石符上畫為級而上隨畫隨登遂冲舉因號
吳公洞

丘公不詳名氏在靈峯後石室中坐煉晝夜精思頓
然覺悟一旦無疾羽化留詩曰本是瀛州仙子倘
徉玄化洞天咲指蓬萊歸去坤飛笑入蒼煙遂號
丘公岩



李良佐字玄輔南唐後主李璟弟也賦性冲淡篤慕
希夷寶大八年辭後主訪道武夷遂居之焉舊觀
唐初在洲渚間後主勅有司移建今址仍賜會仙
爲額環山悉禁張捕樵採鑄銅鐘一口自金陵航
海達闕而至山中敕封玄輔爲演道冲和先生復
增修觀宇賜田給衆後三十七年坐化於清虛堂
乃本宮開山祖師之始也



黃朴紹興初自邵武來武夷訪仙逾數月尋歷殆遍
 無所遇忽於白雲岩下見草庵有道姑屏

處長眉紅頰見

道人問其來故答曰洞天有名而無實仙不可見也時日已暮姑欲邀宿道人曰汝婦人獨居於義不可姑曰此地多虎恐君見傷道人竟不肯入危坐戶外夜半果有虎咆哮而來姑急開門呼之答曰寧死於虎決不入遂堅坐達明虎已潛去姑嘆曰君真有志洞天去此不遠然尚隔深淵非臂羽足雲不可渡君試往若遇樵者當拜而問途及至水際溪流洶湧方顧時間有樵者來道人乃如姑教樵者怒曰饒舌老婆妾世吾事遂令道人閉目挽其衣步雲而行俄至中洞見宮殿崔嵬一人碧冠朱履謂道人曰汝何人敢至此宜速回積功累行他時或可再來遂與胡麻飯食之遣出至崖下回望高山深谷宵非昨境道姑與庵亦失所在道人自是辟穀後蛻骨三仰峯下見崇安舊志





金志陽號楚庵永嘉人也蓬髮不櫛人因以蓬頭仙
 人稱之嘗遇李月溪授以丹訣遍遊名山後至武
 夷道術丕振病者叩求隨以供菓餌之無不立愈
 歲旱召龍警以偈語入水少頃大雨如注居止止
 庵冬不爐夏不扇至元庚辰跌坐而化

王廣邑之黃連坑人幼嘗墮水忽濤浪中一僧挾出
掀之至岸嘉靖間學道依楊道人于武夷勵志苦
修爲衆窘辱不校遇異人指授每登山徃田人見
有兩王廣云將化前一月語道衆曰我即日欲歸
柰師遠出未旋何既數日又曰師今將至某處矣
策杖迂之師回語以欲歸之事師戲曰女何日歸
乎曰明日師曰我方遠回且欲架屋姑少待即應
曰諾又一月餘復問師曰今可矣但卜何日又曰
明日師猶不信詰朝齋沐別道衆端坐而逝全瓠



見存水簾洞中

○羽流

江師隆號三白建陽人本儒家子通經史標格出塵
入道武夷山得雷霆秘術能致晴雨紹定間有錢
塘水孽爲害詔宣赴闕大著靈效授金門羽客旣
而歸武夷御書常庵二字賜之侍郎尤袤副相徐
清叟相得甚謹清叟贈之詩曰上天下地一鶴鞭
風駕霆片符欲識常庵妙處易中曾着工夫九曲
溪頭活計三生石上精魂聞早鬧藍抽脚空山歲
晚啼猿後端坐林壑堂而化

彭日隆邑之吳屯人居冲佑觀遇異人授以雷法祈
禱皆應驗生平未嘗學問讀清淨經徹達玄理信
口吟咏深有理致嘗自讚云五五二十五只管從
頭數到底一也無松稍月當午居清微太和宮又
纂集清淨經註行世後坐化虞集爲之紀
張與王號霜崖三山人博雅善詩居昇真洞遇異人
得秘訣悟玄牝洞徹先天一氣禱求立應四方從
學者衆閩憲觀公薦于朝以疾辭制授法師無疾
而化

林文能號存心三山人素性恬淡博覽諸書頓悟玄
妙嘗衍大義粵古以覺羣迷羽流咸以師事之嘗
遇神授以銅鑄雷印用符水拯濟沉疴及祈禱雨
暘捷應如響修煉於大王峯頂不爐不扇三十八
代天師留國公聞于朝有旨宣召辭疾不起賜號
講師太定甲子年九十有五端坐而化

張克真號平心三山人居武夷至崇安光化寺寺有
妖狐爲祟真得清微雷法召雷擊之遂斃福寧州
大旱真投符龍湫金魚啣符以入頃刻雨大作州

人感送經飛鸞渡舟覆溺者甚衆真儼然端坐無恙迎拜歸家雷電繞匝三十九代天師太玄以真名薦于朝及命下真已羽化

程斯道未平人程正公八世孫學道武夷山叅林文能畱止止庵居之煉九轉神丹得岳澗忠孝雷書雨暘頃刻可致赴薦于朝從張真人醮日月山奉旨賜號通玄子後坐化

王與敬號秋崖三山人少業武夷游湖海叅訪高真留雲州遇亢旱祈禱大應城中妖興夜聞人馬之

聲長史請其治之妖頓滅丞相李固等交薦于朝宣賜至道玄應通妙法師至大二年奉旨還山護冲佑觀嘗有詩曰依然拂袖歸山去止止庵前伴白雲竟化於止止菴

江成真號心隱建陽人少入武夷從張巖隱遊清修甚謹法師黃雷困見而竒之授以清微雷法祈禱輒應後聞于朝授以道判職晚築室水簾洞脩丹養靜無疾而化

萬曆己未仲冬

崇安孫世昌梓行

晉江陳衙發刻



